



# Pre Checo Placerean

## Notis biografichis

### 1920

Ai 30 di novembar, sant Andree, in borc Bulons al nas Checo Placerean, fî di Tite dal muini e di Nute Zanitti, tierç di 5 fradis. Ai 7 di dicembar al ven batiât te glesie di sante Lene dal plevan pre Leon Quagliaro. Vescolât ai 8 di setembar dal 1926.

### 1944

Ai 9 di lui al ven consacrât predi dal vescul di Udin bons. Josef Nogara. Ai 16 di lui al dîs la prime messe. In novembar al partîs par Rome, par indotorâsi e universitât Gregoriane.

### 1948

Al partîs pa l'Argentine, là che al insegne morâl tal seminari di Rosario. Al è confessôr dal gard. Caggiano, di mari furlane, e al fâs amicissie cun bons. Eduardo Pironio, di riunde di Precût, che cumò al è gardenâl a Rome.

### 1952

Al tache a insegnâ religjon al Liceo classic "Jacopo Stellini" di Udin e al "Paolo Diacono" di Cividât. Ativitât culturâl intense come conferensîr, soredu su cuistions di storie, filosofie e religjon, come predicjadôr e come assistent diocesan da l'ACLI (lavorenz) e da l'ACAI (artisans).

### 1967

Al è un dai fondatôrs dal Moviment Friûl, moviment politic-culturâl par che i furlans a cjapin cussience de lôr identitât e si svein dal lôr sotanîsim. Insieme cun âtris predis si fâs promotôr de Mozion dal Clero, là che si domande ai politics furlans di impegnâsi pardabon par un Friûl al pas cun chês âtris regjons. L'iniziativa e ven firmade di 529 predis ma e ven blockade dal vescul Zaffonato pai ricaz di cualchi esponent di partît.

### 1971

Ai 11 di lui, in Aquilee, al ven presentât il Messâl furlan pal an A, a firme di bons. Pieri Cocolin vescul di Gurize. Dal 1973 ai jes il Messâl furlan pal an B, biel che il messâl festîf intîr, vadi il Messâl furlan pai agns ABC, al ven fûr dal 1977. Intant a cjapin pît lis messis par furlan, tacadis di lui. E covente la Bibie te nestre lenghe. Pre Checo al scomence cui libris dal Gnûf Testament. Dal 1970 al jes il Vanseli di nestri Signôr Gjesù Crist e doi agns dopo *I faz, lis letaris dai apuestui e l'Apocalisse*, in colaborazion cun pre Pieri Londar (Pieri Piçul). Ai 26 di genâr dal 1975, a Madone di Gracie, al ven presentât il libri dai Salmos. I granc' profetis a vegnin publicâz dopo dal taramot: Isaie dal 1976 e Gjeremie dal 1978.

## 1974

Dongje de tradizion de messe par furlan pai sanz Ermacure e Furtunât dal mê s di lui di ogni an, pre Checo al invie la *Fieste dal popul furlan (magari cussì no) strenfât pal mont*. Ogni an, la prime domenie di setembar, te basiliche di Einsiedeln (dongje Zurigo), si dà dongje il Friûl de dispersion migratorie. Une ocasion par ribati i diriz di chest popul che al scuén dâ il miôr di sè fûr de sò tiere.

## 1975

La gnove clime instaurade in diocesi dal gnûf vescul Battisti e permet la celebrazion de prime assemblee dal clero udinês. In jugn, par tre dîs, i predis si incuintrin, si scuintrin, si confrontin. Pre Checo al è un dai esponenz dal grop di Glesie Furlane. La assemblee si siere cun tun document significatîf: la fin dal colateralîsim de Glesie cui partîz e la urgjence di une universitât furlane. Se la assemblee no a segnât tant in sot come che e vares mertât, la responsabilitât no jè siguramentri di chei grops culturâi che, magari di posizions diferentis, a cirivin cun fadie une gnove strade in tune situazion stagnant.

## 1976

Ai 6 di mai il taramot al slambre il cûr dal Friûl, soterant in pais, tesauris di art, vitis di gjenerazions. Ancje pre Checo al reste cence cjase, come dute la int di Montenars. In tîmps di aviliment e di disorientament, al è un grant pont di riferiment pe fuarce morâl, pe luciditât de analisi, pe intuizion che il popul al à di saltâ fur pal cjâf e no pai pîs come i muarz. Di lì l'impegn de Glesie par une ricostruzion fedele e rispjetose dai nestris valôrs, par vê finalmentri l'universitât firmade di 125.000 furlans, cu la int e lis ministracions protagonistis e responsabilis in prime persone. Ai 11 di lui la grande messe di Aquilee pes vitimis dal taramot, insieme a pari Turoldo ma cence i vescui.

## 1977

Pre Checo al continue il so lavôr di cussientisazion cu lis messis, lis conferencis, i contaz cu la television e la stampe so redut di lenghe todescje pan internazionalisâ la cuistion dal Friûl, che nol è dome il taramot. Grant impegn e batais tal comitat pe univensitât.

## 1979

Ai 20 di fevrâr pre Checo e pre Antoni Beline a firmin cul editôr Ribis une convenzion pe publicazion integrâl de Bibie. La convenzion e stabilis che la Bibie e sarâ dute di duc'i doi, pal fat che no si varâ di meti, sot dal segnui libris, il non dal tradutôr. Intant la diocesi e nomene une comission di esperz in viste di un *imprimatur*. Si decît di scomençâ cul Gnûf Testament (voll. 6 e 7) parceche disponibil prime.

## 1980

Pre Checo, che za tal dopo taramot al veve scomençât a vê fastidis cu la salût, al sta pierdint lis fuarcis. La malatie lu isole simpri di plui dal so contest usuâl, fat di scuele, di impegn politic, di culture e di glesie. Ai scuén frontâ i agns tormentâz e umilianz, par un omp vîf come lui, de inativitât.

## 1983

In lui al fâs la ultime predicje, pôs minûz, te messe di san Ermacure, domandant, in non dai patriarcjât fruçât par resons politichis, che si rivi a imbastî amancul une conference episcopâl regionâl. Ai 17 di dicembar la Biblioteche Laurenziane di Buje i dà il premi “Nadâl furlan” pe so testimoniance coerente, concrete, inteligjente e passionade di amôr pal Friûl. Nol à vût il premi Pefanie.

## 1984

Ai 22 di jugn, te sale consiliâr de provincie di Udin, presentazion uficiâl de Bibie par furlan cui vescui Battisti e Pizzoni, cul president de Provincie Englaro, chel de Filologjche Mizzau, il diretôr de Vite Catoliche Corgnali, ch’ al ten la prolusion. Pre Checo al è presint ma cun grande soference e distac. Nol dîs une peraule. Al rivarà a vê in man nome il volum dai Vansei.

## 1986

Ai 18 di novembar pre Checo al mûr tal ospedâl di Udin. Tal funeral, fat sul plaçâl de glesie di sante Lene, sdrumade, il vescul Battisti si impegne, come Glesie, a onorâ lis grandis passions e intuizions di pre Checo, tacant le celebrazion liturgjche par furlan. Al ven metût a polsâ sot la crôs di Aquilee, “te pâs e tal tasê di Diu e al spiete ch’al sucedi ce ch’al à simpri crodût”.

*Tratto da **Pre Checo “vîf”**, Montenars, 30 novembar 1996 - Ripublicazion dal n. 12 (Dicembar 1986) dal test de “Patrie dal Friûl” – Comune di Montenars*